

ԵՆԹԱԿԱՅԻ ԵՎ ՍՏՈՐՈԳՅԱԼԻ ԿԱՊԱԿՑՈՒԹՅԱՆ ՀԱՐՑԻ ՇՈՒՐՋ

ՀԵՆՐԻԿ ՀԱՐՈՒԹՅՈՒՆՅԱՆ

Նախադասությունն իբրև շարահյուսական կառույց ձևավորվում է հնթա-
կա+ստորոգյալ կապակցության հիմքի վրա, որը նախադասության միջու-
կային կառույցն է և՛ կառուցվածքային, և՛ հաղորդակցային-իմաստային
առումով: Այս տեսակետից ամենևին էլ պատահական չէ, որ բոլորների
ակադեմիական քերականության (1970 թ.) հեղինակները նախադասության
կառուցվածքային կաղապարները բանաձևելիս հիմնվում են ենթակայի և
ստորոգյալի կապակցության վրա: Ենթակայի և ստորոգյալի հարաբերու-
թյան քննությունը շարահյուսության կենտրոնական, հանգուցային ու բարդ
խնդիրներից մեկն է: Իհարկե, շքեղ կարող ասել, թե այս շատ կարևոր հարցը
լեզվաբանների ուղղորդությանը չի արժանացել: Ընդհակառակը, այն քննվել է
հնագույն շրջաններից սկսած: Նպատակ շունենալով հանգամանորեն խոսելու
լեզվաբանական տարբեր ուղղությունների ու տարբեր լեզվաբանների տեսա-
կետների մասին, կաշխատենք խմբավորել դրանք ըստ ընդհանրությունների,
այնուհետև շարադրել մեր նկատառումները, հայտնել մեր կարծիքը:

Հարցի վերաբերյալ եղած կարծիքները կարելի է խմբավորել երեք ընդ-
հանուր կետով:

1. Ենթական և ստորոգյալը նախադասության հավասարազոր անդամներ
են և կապվում են փոխադարձ ստորադասությամբ:

2. Գլխավորը, կարևորը ենթական է, քանի որ ստորոգյալը ենթակային
վերագրվող հատկանիշ է և դրանով իսկ որոշ իմաստով նրանից կախյալ:

3. Նախադասության կառուցվածքային կենտրոնը, հետևաբար և գլխա-
վորը ստորոգյալն է, ենթական նրա քերականական լրացումն է, նրանից
կախյալ:

Ըստ էության գործ ունենք միմյանց բացառող երեք տեսակետների հետ,
որոնք շարահյուսական վերլուծության հարցում տարբեր մոտեցումների ար-
տահայտություններ են: Նախապես ասենք, որ մենք երրորդ տեսակետի
կողմնակից ենք, հետևաբար մեր առարկությունները վերաբերում են առա-
ջին երկուսին միաժամանակ, որոնք միշտ չէ, որ միմյանցից որոշակիորեն
սահմանազատված են արտահայտվում: Նախքան մեր փաստարկները շա-
րադրելը և ժամանակակից հայերենի տվյալներով երրորդ տեսակետը հիմ-
նավորելը համառոտակի անդրադառնանք առհասարակ շարահյուսական կա-
պակցությանը վերաբերող որոշ հարցերի, որոնք ընկած են մեր վերլուծու-
թյունների հիմքում:

Պետք է հստակորեն տարբերակել շարահյուսական ճառաբերության տե-
սակ և կապակցության եղանակ հասկացությունները, որոնք բնորոշ են շա-
րահյուսական կառույցներին:

Հարաբերության տեսակ ասելով նկատի ունենք շարահյուսորեն կապված
շարահյուսական նվազագույն միավորների՝ միմյանց նկատմամբ ունեցած

հարաբերությունը, որ կարող է լինել հավասարների, համադաս միավորների կապակցություն և ոչ հավասարների, ոչ համադաս միավորների կապակցություն: Առաջին դեպքում գործ ունենք բազմակի անդամների հետ՝ կառմիւր և կապույտ (մատիտներ), հաց և խնձոր (ուտել), ես և Արամը (գնացիք) և այդ կապակցությունը կոչում ենք համադասական: Երկրորդ դեպքում կապակցվում են ոչ հավասարազոր միավորներ (կառմիւր մատիտ, ես գնացի, ուտել հաց): Այս դեպքում կապակցվող միավորների միջև կան երկու տեսակի հարաբերություններ՝ ստորադասական և ստորագումային: Ուրեմն շարահյուսական կառույցի բաղադրիչները միմյանց նկատմամբ երեք տեսակի հարաբերության մեջ են՝ համադասական, ստորադասական և ստորագումային:

Կապակցության եղանակ ասելով նկատի ունենք շարահյուսական այն միջոցները, որոնցով կապակցվում են շարահյուսական կառույցի միավորները՝ հիմնվելով ստորադաս միավորի քերականական ձևի վրա: Ժամանակակից հայերենում կապակցության եղանակները երեքն են՝ կառավարում, համաձայնություն, առդրություն: Բնթակայի և ստորոգյալի կապակցության էությունը բացահայտելու համար նկատի պիտի ունենանք և՛ հարաբերության տեսակը, և՛ կապակցության եղանակը: Իհարկե, այս հարցերը քննված են քերականագիտության մեջ, բայց ո՛չ հստակ տարբերակումով և ենթակայի ու ստորոգյալի հարաբերության մեջ ո՛չ միասնական, ո՛չ երկուսի միաժամանակյա հաշվառումով: Միայն նշվում է, որ ենթական ու ստորոգյալը կապվում են համաձայնությամբ: Մասամբ այստեղից են գալիս ավանդական քերականության՝ այս հարցում նկատվող թերություններն ու առկա հակասությունները: Եթե սրան ավելացնենք նաև այն, որ ավանդական քերականությունը հաճախ հակված է եղել իր վերլուծությունների հիմքում դնելու տրամաբանական դատողությունների կաղապարները՝ հաճախ անտեսելով լեզվական կառույցի յուրահատկությունները, ապա ասելիքն ավելի պարզ կդառնա: Հարցին այդպես մոտենալու դեպքում, իրոք, ենթական դառնում է տրամաբանորեն գլխավորը, քանի որ նա է ստորոգյալով արտահայտված գործողության կատարողը, հատկանիշի տերը (հիշենք ենթակայի ավանդական, դասագրքային սահմանումը), իսկ ստորոգյալը քանի որ ենթակային վերադրվող հատկանիշ է, գործողություն, հետևաբար տրամաբանորեն կախված է նրանից, դեմքով ու թվով համաձայնում է ենթակային: Փաստորեն այս տրամաբանությամբ հարցի քննությունը առաջացնում է տրամաբանական հակասություն: Նկատի ունենք նաև այն մոտեցումը, ըստ որի ենթական և ստորոգյալը հավասարաչափ նախադասության գլխավոր անդամներ են: Դիմենք «Ժամանակակից հայոց լեզու» աշխատության մեջ եղած կարծիքին. «Ենթական նախադասության գլխավոր անդամներից մեկն է, այն հավասարական հարաբերության մեջ է գտնվում ստորոգյալի նկատմամբ, այսինքն չի լրացնում վերջինիս, կախյալ կամ լրացական հարաբերության մեջ չի գտնվում նրա նկատմամբ»¹: Այնուհետև, Քրեյերի այն կապակցությունը, որի դեպքում ստորադաս անդամը այս կամ այն ձևն է ստանում գերադաս անդամի

¹ Բացի այս երեք տեսակի հարաբերություններից կան նաև համաստորադասություն և անհաստորադասություն. համադասությունն ու ստորադասությունը անխառն հանդես չեն գալիս:

² Ս. Գ. Աբրահամյան, Ն. Ա. Պառնասյան, Հ. Ա. Օհանյան, Խ. Գ. Բադեկյան, Ժամանակակից հայոց լեզու, հ. 3, Երևան, 1976, էջ 139:

իմաստային կամ փրկական կարգերի թելադրությամբ կամ էլ փոփոխություն չի կրում նրա պահանջով, կոչվում է կապակցություն: «Կապակցությունը դրսևորվում է համաձայնությամբ. խնդրանքությամբ և առդրությամբ»: «Թեև ենթական և ստորագյալը իրար նկատմամբ հավասարական ևարարելության մեջ են գտնվում և նրանցից որեւէ մեկը գերադաս չէ մյուսի համեմատությամբ, սակայն ստորագյալը փրկական կամ որոշակի փոփոխություն է կրում, երբ փոփոխվում է ենթականի դեմքը կամ թիվը»³ (ընդգծումները մերն են—Հ. Հ.): Այստեղ որոշակիորեն արտահայտվում է այն հակասությունը, որ առկա է որոշ հայ քերականների աշխատություններում, ովքեր այս կամ այն առիթով խոսել են ենթականի և ստորագյալի կապակցության մասին: Ո՞րն է այդ հակասությունը: Ասվում է, որ համաձայնությունը կապակցության դրսևորման ձև է, որտեղ «ստորադաս անդամը այս կամ այն ձևն է ստանում գերադաս անդամի... թելադրությամբ», ենթական և ստորագյալը համաձայնում են դեմքով ու թվով. ընդ որում, ստորագյալն է համաձայնում ենթականին, և մյուս կողմից նրանց հարաբերությունը դիտվում է իբրև հավասարների հարաբերություն:

Իրոք, համաձայնությունը ստորադասական կապակցության եղանակ է, և ստորադասության դեպքում գործ ունենք ոչ հավասարազոր բաղադրիչների հետ: Ենթական և ստորագյալը կապվում են համաձայնությամբ, հետևաբար նրանք հավասարազոր գլխավոր անդամներ լինել չեն կարող:

Ինչպես ասացինք, կա նաև այն տեսակետը, ըստ որի ենթականի և ստորագյալի կապակցություն մեջ, հետևաբար և ամբողջ նախադասության կառուցվածքում ավելի կարևորը, ավելի գլխավորը ստորագյալն է: Այս տեսակետը համեմատաբար նոր է այն իմաստով, որ մեր օրերում ավելի շատ կողմնակիցներ ունի: Դեռևս X դարում Հովհ. Քննիցին գրում էր. «աստ գիտելի է, զի ամենայն անձնական բայ խնդրէ զուղղականն յառաջկույս»⁴: XVIIII դ. վերջերին Մ. Չամչյանը գրում էր. «Եթե բայն իղէ դիմաւոր, անուն պարտի դնիլ յուղղական հոլովն»⁵: Ավելի ուշ Գ. Ավետիքյանը նշում է. «Դիմաւոր բայն պահանջէ զտէր՝ յուղղական հոլովն»⁶: Եթե իմի բերենք այս կարծիքները, պիտի ասենք, որ դրանց հեղինակները, թեև ենթական որոշակիորեն չեն համարում ստորագյալի լրացում (դիմավոր բայի), այնուամենայնիվ գրում են, որ ստորագյալը պահանջում է ուղղականով արտահայտված ենթակա: Իսկ եթե պահանջում է, ուրեմն պահանջողը գերադաս է, պահանջվողը ստորադաս: Այս տեսակետի հետևողական պաշտպանը մեր իրականության մեջ Մ. Արեղյանն էր: Ահա ինչ է գրում նա. «Խոսքն (=նախադասություն—Հ. Հ.) ուրեմն իր ամենապարզ ձևով կազմվում է մի բայից, առանց բայի խոսք չկա, որովհետև մյուս տեսակի բառերը ստորագում չեն ցույց տալիս...», «ամեն բայ, ընդհանրապես, մենակ կազմում է մի խոսք, որովհետև ցույց է տալիս թե՛ ստորագում և թե՛ խոսքի համար անհրաժեշտ՝ ենթականի և ստորագյալի (առարկայի և հատկանիշի) գաղափարները», «ենթակա ասվում են, ուրեմն, այն լրացումները, որոնք բացահայտում են բայի դեմքը, որոշ կեր-

³ Սույն տեղում, էջ 298.

⁴ Յ ո վ հ. Ք ք ն ե ց ի, Ցաղազա քերականին, Երևան, 1977, էջ 200.

⁵ Մ. Չ ա մ շ յ ա ն, Քերականութիւն Հայկազեան լեզուի, Վենետիկ, 1779, էջ 404.

⁶ Գ. Ա վ ե տ ի ք ե ա ն, Քերականութիւն Հայկական, Վենետիկ, 1815, էջ 463.

պով ցույց տալով անող կամ եղող առարկան, որին վերադրվում է բայիմաստը կամ մի հատկանիշ⁷։

Մեզ հետաքրքրող հարցին անդրադարձել է նաև Գ. Զահուկյանը «Ժամանակակից հայերենի տեսության հիմունքները» աշխատության մեջ, որը իր հարցադրումներով, վերլուծության մեթոդներով, դիպուկ ու նուրբ դիտողություններով, եզրակացություններով երևույթ է հայ լեզվաբանության մեջ։ Նա տարբերում է ենթակայի երեք կարգի ըմբռնում՝ իրական ենթակա, հոգեբանական ենթակա և լեզվաքերականական ենթակա և ըստ այդ երեք ըմբռնումների քննում է ենթակայի ու ստորոգյալի հարաբերությունը, տարբերակելով նաև ձևական և ոչ ձևական ենթականեր։ Չանտեսելով տարբեր տեսանկյուններից ենթակայի և ստորոգյալի կապակցության վերլուծության կարելիությունն առանձին դեպքերում, այնուամենայնիվ, կարծում ենք, որ լեզվաբանության և առհասարակ քերականական աշխատությունների առաջնահերթ խնդիրն է լեզվաքերականական ենթակայի և նրա ու ստորոգյալի հարաբերության բացահայտումը։ Նախադասության անդամների հարաբերությունը քննելիս Գ. Զահուկյանը տարբերում է երկու «մակարդակ»՝ հաղորդալի և հաղորդակցալի։ «...առաջին դեպքում բայ-ստորոգյալը հանդես է գալիս որպես առարկաների հարաբերության դրսևորում..., ուստի և դառնում է յուրատեսակ կենտրոն», «...երկրորդ դեպքում որպես նախադասության կենտրոն հանդես է գալիս այսպես կոչված ենթական, մտքի այն առարկան, որը խոսողի ուշադրության կենտրոնում է»։ Այնուհետև՝ «...ենթական հաղորդակցալին առումով կենտրոնական անդամ է, հաղորդալին առումով՝ դիմավոր բայով արտահայտված հարաբերության կողմերից մեկը, այսինքն՝ բայական արժույթի մի դրսևորումը, հետևաբար դիմավոր բայի համեմատությունամբ լրացական անդամ»⁸։ Կրկնում ենք, լեզվաբանության համար առաջնալիքը լեզվաքերականական հարաբերությունն է։ Նկատենք, որ հաղորդակցալին, տրամաբանական-հոգեբանական իմաստով նույնիսկ լրացումը կարող է դառնալ գլխավորը, հիմնականը՝ կրելով տրամաբանական շեշտ։ Գ. Զահուկյանի մեկնաբանության մեջ ուշադրության արժանի է գիտության համար ոչ պակաս կարևոր մի հանգամանք. նա իրավացիորեն այս կամ այն տեսակետը չի համարում ճիշտ կամ սխալ, այլ որոշակիորեն նշում է, որ վերլուծության տարբեր ելակետերից գլխավոր կարելի է համարել և՛ ենթական, և՛ ստորոգյալը։ Բայց, կրկնում ենք, ենթական և ստորոգյալը լեզվի մեջ առաջին հերթին պիտի գնահատել իբրև շարահյուսական կառույցի, նախադասության կառուցվածքալի տարրեր, և նրանց հարաբերությունն առաջին հերթին պետք է գնահատվի հենց այդ ելակետից։

Ենթակայի ու ստորոգյալի կապակցության մեջ և առհասարակ նախադասության կառուցվածքում ստորոգյալը ամենակարևոր անդամն են համարում նաև այլ լեզվաբաններ։ Բենվենիստը, օրինակ նախադասության բոլոր հատկանիշները ստորոգման համեմատությամբ համարելով երկրորդական, գրում է. «...պարտադիր չէ «սուբյեկտի» (ենթակայի) առկայությունը

⁷ Մ. Աբեղյան, Հայոց լեզվի տեսություն, Երևան, 1965, էջ 362, 370։ Բայ ասելով Մ. Աբեղյանը նկատի ունի միայն դիմավոր բայերը, և ստորոգյալի նրա ըմբռնումը չի նույնանում ավանդական ըմբռնմանը։

⁸ Գ. Զահուկյան, Ժամանակակից հայերենի տեսության հիմունքները, Երևան, 1974, էջ 333, 334, 388։

պրեդիկատի կողքին: Նախադասության ստորոգող անդամն ինքնին բավական է, քանի որ նա որոշում է սուբյեկտը⁹: Ծ. Կուրիլովիչը նշում է. «...բնորոշել ամբողջ նախադասությունը, նշանակում է բնորոշել նախադասության ստորոգյալը»¹⁰: Իսկ Լ. Թենիերը գրում է. «Կառուցվածքային և ոչ իմաստային տեսակետից ենթական այնպիսի լրացում է, ինչպես մյուսները»¹¹: Հիշատակենք նաև Վ. Յուրչենկոյի կարծիքը ստորոգյալի շատ կարևոր դերի մասին: Նա նշում է երեք հիմնական դեր. ա) կարգային, որ ցույց է տալիս ստորոգվող հատկանիշը, բ) հարաբերային, որ ծառայում է իբրև կապող և անմիջական օղակ ենթակայի ու բայական լրացումների միջև, գ) եղանակավորող, որ արտահայտում է եղանակի և ժամանակի կարգեր¹²: Հարկ չկա վկայակոչելու այլ լեզվաբանների¹³, մանավանդ որ միշտ չէ, որ լեզուներում նախադասության կառուցվածքը, բառերի կապակցության եղանակները և նրանց միջև եղած հարաբերությունները նույնն են:

Այժմ բերենք այն փաստարկները, որոնց վրա հիմնվելով կարելի է պնդել, որ հայերենում նախադասության կառուցվածքային կենտրոնը, հետևաբար և գլխավոր անդամը ստորոգյալն է, ենթական քերականորեն կախված է նրանից:

1. Իբրև առաջին և հիմնական ապացույց նշենք, որ առանց ստորոգյալի նախադասություն չի լինում, քանի որ նախադասությունն իբրև այդպիսին ձևավորող հիմնական հատկանիշը՝ ստորոգումն արտահայտվում է միայն դիմավոր բայով, այն է՝ ստորոգյալով: Հետևաբար ստորոգյալը նախադասությունը ձևավորող հիմնական անդամն է, անհրաժեշտն ու պարտադիրը¹⁴:

2. Շատ դեպքերում դիմավոր բայ-ստորոգյալի մեջ արդեն պարունակվում է ենթակայի գաղափար. գրում ենք, գրելու ենք, գրեցինք, կգրենք, պիտի գրենք ստորոգյալների ենթական կարող է լինել մենք դերանունը (= ես, Արամը, Վարդանը...), իսկ գրում ես, գրելու ես, կգրես և այլ ստորոգյալների ենթական դու-ն է: Հակառակը չենք կարող ասել. մենք ենթակայի համար ստորոգյալներ կարող են լինել առաջին դեմքի հոգնակի թվի բոլոր բայերը: Սա նշանակում է, որ ենթական որոշ իմաստով բայի դեմքի արտահայտությունն է իբրև հավելում, և պատահական չէ, որ առաջին ու երկրորդ դեմքեր ունեցող ստորոգյալների հետ սովորաբար ենթակաները բառական արտահայտություն չեն ստանում¹⁵ (նկատի չունենք ոճական կիրառությունները):

3. Հայերենում, ինչպես և այլ լեզուներում գոյություն ունեն անենթական

⁹ Э. Бенвенист, Общая лингвистика, М., 1974, с. 138.

¹⁰ Е. Курнелович, Очерки по лингвистике, М., 1968, с. 53.

¹¹ Z. Tesnière, Elements de syntaxe structurale, Paris, 1969, p. 169.

¹² В. Юрченко, Сказуемое («Вопросы языкознания», 1977, № 6, с. 44).

¹³ Խոսելով ենթակայի և ստորոգյալի կապակցության մասին, է. Աթայանը գրում է. «ենթակայի մի շարք շարահյուսական առանձնահատկություններ... ստիպում են մտածել, որ այն բային ստորադասված տարր է, ինչպես խնդիրը» (Э. Атаян, Понятие элементарной синтаксической структуры, Ереван, 1964, с. 64).

¹⁴ Խոսքը չի վերաբերում անդեմ նախադասություններին, որոնք ոչ սովորական կառույցներ են:

¹⁵ Այս իմաստով Յու. Ապրեսյանը գրում է. «...Ստորոգյալը չի կարելի բաց թողնել առանց խախտելու նախադասության ճշտությունը, այն դեպքում, երբ շատ նախադասություններ կանոնական են առանց ենթակայի» (Ю. Апресян, Идеи и методы современной структурной лингвистики, М., 1966, с. 174).

նախադասություններ, որոնք ունեն մեկ գլխավոր անդամ՝ ստորոգյալ (լուսացավ: Յրտեց: Անձրեւում է և այլն), մինչդեռ ենթակայով անստորոգյալ նախադասությունները բացառվում են:

4. Հայերենում կան մի շարք բայեր, որոնք ստորոգյալ դառնալիս պահանջում են հոգնակի ենթակա կամ եզակի ենթակա և հետ կապով արտահայտված ուղեկցող խնդիր, որը խորքային կառույցում, ի վերջո, ենթակա է, գործողության կատարման մասնակից. հավաքվել, ժողովվել, կուտակվել, պիզվել, խմբվել, շարվել, կիտվել, գրկախառնվել, ծեծվել¹⁶. Ուսանողները հավաքվեցին: Մայրը գրկախառնվեց որդու հետ և այլն:

5. Ստորոգյալի կենտրոնական, գլխավոր անդամ լինելու ապացույց կարող է լինել նաև շարահյուսական—տրամաբանական այն երևույթը, որ նախադասության շեշտվող բառը (այդ թվում նաև ենթական) սովորաբար ընկնում է ստորոգյալի (օժանդակ բայի) կողքին. Ուսանողը դասերից հետո պարապում է ընթերցաբանում: Ուսանողը դասերից հետո է պարապում ընթերցաբանում: Դասերից հետո ուսանողն է պարապում ընթերցաբանում: Դասերից հետո ուսանողը ընթերցաբանում է պարապում: Շարահյուսության հետ կապված ավելացնենք նաև այն, որ մի շարք այնպիսի նախադասություններում, որոնցում ենթական և ուղիղ խնդիրը ձևաբանորեն տարբերակված չեն, ենթական որոշելը բավականին դժվար է: Այս դեպքում սոսկ տրամաբանական դատողությունը չի օգնի, պիտի դիմենք նաև շարահյուսության օգնությանը: Օրինակ՝ փայտը կտրեց փայր: Որն է ենթական՝ փայր, թե փայտը: Տրամաբանությունը չի օգնի, որովհետև, ճիշտ է, ավելի հաճախ քարն է փայտ կտրում, բայց չի բացառվում, որ փայտն էլ քար կտորի: Նման դեպքերում ստորոգյալից առաջ ընկած բառը պետք է համարել ենթակա: Իսկ ստորոգյալը, պայմանավորված նրա արտահայտությամբ, բոլոր տեսակի կառույցներում մնում է ստորոգյալ:

6. Նախադասությունների ըստ հնչերանգի դասդասումը (պատմողական, հարցական, հրամայական, բացականչական) սովորաբար համապատասխանում է ստորոգյալի քերականական ձևավորմանը. պատմողական նախադասություններում սովորական են սահմանական եղանակի բայաձևերով ստորոգյալները, հրամայականում՝ հրամայական, բացականչականում՝ ըղձական, իսկ հարցականում հրամայական չի լինում:

7. Վկայակոչենք նաև հայերենի պատմական և էրգատիվ լեզուների փաստերն իբրև լրացուցիչ ապացույցներ: Գրաբարում կան առանձին դեպքեր, որոնցում ենթակայի հոլովի կախվածությունը ստորոգյալից ավելի ակնառու է: Օրինակ՝ անցյալ դերբայով և օժանդակ բայի եզակի երրորդ դեմքով կազմված բաղադրյալ ժամանակաձևերով արտահայտված ստորոգյալի հետ ենթական դրվում էր սեռական հոլովով, իսկ եղանակիչ բայերի հետ՝ տրական հոլովով: Իսկ էրգատիվ լեզուներում ենթակայի հոլովը կառավարվում է ուղիղ խնդրով և ստորոգյալով, որոշ լեզուներում ենթակայի հոլովների թիվը, պայմանավորված ստորոգյալի իմաստով, կարող է հասնել վեցի¹⁷:

¹⁶ Ա. Արրահայան, Բայը ժամանակակից հայերենում, Ա, Երևան, 1965, էջ 635:

¹⁷ А. Мещанинов, Члены предложения и части речи, Л., 1978; И. Сизова, Что такое синтаксис?, М., 1966, с. 50; Г. Климов, Очерк общей теории эргативности, М., 1973, с. 78—79.

8. Դիմենք նաև փոխակերպման օգնությանը: Ներգործածե կառուցվածքի նախադասությունները կրավորաձևի փոխակերպելիս ստորոգյալը մնում է նույնը (ներգործական սեռի բայը դառնում է կրավորական), սակայն ենթական վերածվում է խնդրի, խնդիրը՝ ենթակայի: Քամին բացեց պատուհանը→Պատուհանը բացվեց ֆամուց: Իհարկե, խորքային իմաստով կրավորաձև կառուցվածքում քամուց բառը մնում է ենթակա իբրև գործողություն կատարող, սակայն այն ոչ ոք ենթակա չի համարում, որովհետև քերականության մեջ, ի վերջո, կարևորը մակերեսային կառուցվածքն է, քերականական ենթական:

9. Հնդունված է ասել, որ բարդ ստորադասական նախադասության մեջ երկրորդական նախադասությունը կատարում է գլխավորի այս կամ այն անդամի լրացման դեր: Նշանակում է, երկրորդական նախադասությամբ կարող են արտահայտվել միայն երկրորդական անդամները՝ լրացումները, ինչպիսին են ստորոգելին (ստորոգելիական վերադիր), որոշիչը, խնդիրները, ուրազաները: Հայերենում կան նաև ենթակա երկրորդական նախադասություններ, հետևաբար ենթական նույնպիսի լրացում է, ինչպես մյուս անդամները: Ստորոգյալ երկրորդական նախադասություն չի կարող լինել:

Կարծում ենք, այսքանը բավարար փաստարկներ են պնդելու, որ ենթական ու ստորոգյալը երբեք էլ նախադասության համազոր անդամներ չեն, քերականորեն գլխավորը, նախադասություն ստեղծողը ստորոգյալն է, ենթական քերականական կախման մեջ է ստորոգյալից: Սակայն չպետք է կարծել, որ դրանով ենթական հավասարեցնում ենք բայական մյուս լրացումներին (խնդիրներ, պարագաներ), թեև կան այս տեսակետի կողմնակիցներ: Լինելով քերականորեն ստորոգյալից կախյալ՝ ենթական խնդիրներից և պարագաներից տարբերվում է հարաբերության տեսակով, որը կոչվում է ստորոգումային: Այնուհետև, եթե որևէ հոլովով արտահայտված խնդիրը կամ պարագան ունեն կապակցելիության սահմանափակություն, կարող են կապակցվել որոշակի խմբի բայերի, ապա ենթական ազատ է այդ սահմանափակումից, կարող է կապակցվել բոլոր դիմավոր բայերին՝ ուղղական հոլովով: Սակայն, ի տարբերություն խնդիրների և պարագաների, ենթական կապակցվում է միայն դիմավոր բային և այս իմաստով ունենում որոշ սահմանափակում¹⁸:

Ասվածից երևում է, որ ենթական համարում ենք դիմավոր բայի քերականական խնդիր, որը ստորոգյալի պահանջով սովորաբար արտահայտվում է ուղղական հոլովով¹⁹, և իբրև կապակցության եղանակ գործում է կառավարումը: Բայց մյուս կողմից հայտնի է, որ ենթական և ստորոգյալը քերականորեն համաձայնում են դեմքով և թվով: Սա նշանակում է, որ ստորոգումային հարաբերությունը կապակցության եղանակով երկբնույթ է՝ գործում են

¹⁸ Այս դեպքում նկատի ունենք մակերեսային կառուցվածքները, քանի որ խորքային կառուցվածքում ենթակա կարող են ունենալ ոչ դիմավոր բայերը, ոչ քերականական ստորոգյալները, եթե ավանդաբար ենթակա համարվում է գործողություն կատարողը. ուսանողի գնալը-աշակերտի պատմելը, իմ քայլելը և այլն:

¹⁹ Ժամանակակից հայերենում ենթական կարող է դրվել նաև բացառական հոլովով այն դեպքում, երբ չի վերցվում ամբողջ ծավալով. քղթերից թափվեցին հատակին, կատարվեցին Կոմիտասի ստեղծագործություններից (տե՛ս Ս. Արա հ ա մ յ ա ն, Ժամանակակից հայերենի շարահյուսության մի քանի հարցեր, Երևան, 1982, էջ 16):

կառավարումը և համաձայնությունը²⁰։ Սա ըստ էության յուրահատուկ, ոչ սովորական կառավարում է, որովհետև բնթակայի հոլովը պայմանավորվում է ոչ թե բայ-ստորոգյալի բառական իմաստով, սեռով, կազմությամբ և այլն, այլ միայն բայի դիմավորությամբ, իբրև դիմավոր բայի լրացում։ Այդ է պատճառը, որ դիմավոր բայը անդեմ դարձնելիս բնթական վերանում է կամ, այլ ըմբռնմամբ, վերածվում կողմնակի բնթակայի՝ այլ հոլովով։ Ճայրը գնում է→նօր գնալը, աշակերտը պատմում է→աշակերտի պատմելը, ես ֆայլում եմ→իմ ֆայլելը և այլն, իսկ մյուս բոլոր լրացումները մնում են՝ հավասարաշափ բնորոշ լինելով և՛ դիմավոր, և՛ անդեմ բայերին։

Ամփոփենք. հայերենում բնթական ու ստորոգյալը չենք դիտում որպես հավասարադոր գլխավոր անդամներ։ Նրանք երբեք էլ հավասարադոր ու հավասարաշափ գլխավոր լինել չեն կարող, քանի որ ունեն քերականական բոլորովին տարբեր արտահայտություն. ստորոգյալն արտահայտվում է միայն դիմավոր բայերով, բնթական՝ գոյականի ուղղական հոլովով (նաև գոյական դերանուններով և գոյականաբար առնված այլ բառերով)։ Բոլորովին տարբեր է նրանց դերն ու նշանակությունը նախադասության կառուցվածքում, էլ ինչպե՞ս կարող են նրանք հավասարադոր գլխավոր լինել։

Ենելով այս ըմբռնումից, փորձենք ընդհանուր ձևով խմբավորել նախադասություն կազմող բառերը՝ նկատի ունենալով միջուկային անդամի՝ ստորոգյալի և առհասարակ նախադասության մյուս բառերի հետ ունեցած կապն ու փոխհարաբերությունը, նրանք քերականական արտահայտությունը, դերն ու նշանակությունը։ Հասկանալի է, ստորոգյալը դիտում ենք առաջին կարգի կառուցվածքային անդամ։ Սրան անմիջականորեն կապված է բնթական որպես միայն դիմավոր բայի լրացում, երկրորդ կարգի անդամ, և այդ կապակցության հիմքի վրա ձևավորվում է նախադասության միջուկային կառույցը։ Երրորդ կարգի են մնացած ստորադաս բառերը, որոնք կարող են լինել կամ բայի լրացում (խնդիր, պարագա) կամ գոյականի (որոշիչն իր ենթատեսակներով)։ Ընդ որում, բայական երրորդ կարգի լրացումները կապվում են և՛ դիմավոր, և՛ անդեմ բայերին՝ ստորոգյալ և ոչ ստորոգյալ բայերին։ Նախադասության անդամների շարքում յուրահատուկ տեղ ունի ստորոգելին (ստորոգելիական վերադիր)։ Մի կողմից այն որոշ խմբի դիմավոր բայերի պահանջով դրված բայական լրացում է, մյուս կողմից ցույց է տալիս բնթակայի հատկանիշը՝ դառնալով միջուկային կառույցի բաղադրիչ։ Այս խմբավորումից դուրս մնացին երանգավորող բառերը, որոնք գոյություն ունեն միայն նախադասության կառուցվածքում (և ոչ բառակապակցության, ինչպես որոշիչը, խնդիրը, պարագան) և ավանդաբար նախադասության անդամ չեն համարվում, եղանակավորում են առանձին անդամներ կամ ամբողջ նախադասությունը, իսկ կոչական կոչվածները ցույց են տալիս, թե ում է ուղղված խոսքը, ում է դիմում խոսողը։

²⁰ Բնթակայի ու ստորոգյալի կապը դիտելով որպես փոխադարձ ստորադասություն, Ե. Սկոբլիկովան գրում է. «Ստորոգյալի սեռի և թվի համաձայնությունը արտահայտում են նրա ստորադասությունը բնթակային, իսկ բնթակայի ուղղական հոլովը հիմնվում է ստորոգյալի նկատմամբ նրա ստորադասության վրա» (Е. Скобликова, Согласование и управление в русском языке, М., 1971, с. 76)։

К ВОПРОСУ О СОЧЕТАНИИ ПОДЛЕЖАЩЕГО И СКАЗУЕМОГО

ГЕНРИК АРУТЮНЯН

Резюме

Анализ ряда языковых фактов выявляет, что ядром, структурным центром предложения в армянском языке является спрягаемый глагол-сказуемое, а подлежащее со структурно-грамматической точки зрения подчинено сказуемому, так как: а) сказуемое выражает основной признак предложения — предикацию, б) имеются предложения без подлежащего, но нет предложений без сказуемого, в) подлежащее может быть выражено придаточным предложением, которое восполняет сказуемое главного предложения, г) при трансформации действительного залога (конструкции) в страдательный подлежащее меняется, сказуемое остается прежним, д) член предложения, несущий на себе логическое ударение, ставится рядом со сказуемым и т. д. Все это, однако, не означает, что подлежащее является обычным дополнением, так как оно подчиняется только спрягаемому глаголу.